



KENYATAAN MEDIA

KEMENTERIAN PERDAGANGAN DALAM NEGERI
DAN KOS SARA HIDUP

No. 13 Persiaran Perdana, Presint 2,
62623 Putrajaya

No. Telefon : 03-8882 5562

No. Fax : 03-8882 5569

TINJAUAN SEMPENA PELAKSANAAN SKIM HARGA MAKSIMUM MUSIM PERAYAAN TAHUN BARU CINA 2024

KUANTAN, 8 FEBRUARI 2024 – Yang Berhormat Timbalan Menteri Perdagangan Dalam Negeri dan Kos Sara Hidup, Senator Puan Hajah Fuziah binti Salleh telah mengadakan lawatan turun padang bagi membuat tinjauan di lapangan sempena pelaksanaan Skim Harga Maksimum Musim Perayaan Tahun Baru Cina 2024 yang berkuat kuasa bermula 6 Februari sehingga 14 Februari 2024 seperti yang diumumkan oleh YB Menteri Perdagangan Dalam Negeri dan Kos Sara Hidup pada 2 Februari 2024. Tempoh pelaksanaan adalah selama 9 hari iaitu 4 hari sebelum perayaan, 1 hari semasa perayaan dan 4 hari selepas perayaan.

Tujuan utama tinjauan dilakukan adalah bagi memastikan semua pihak terutama para peniaga dapat mematuhi harga-harga barangan yang telah diwartakan ini dan menggunakan label merah jambu bagi barangan yang dikawal harganya.

Sebanyak 11 jenis barangan yang diwartakan bagi pelaksanaan Skim Harga Maksimum Musim Perayaan Tahun Baru Cina 2024 dan senarai barangan bagi adalah seperti berikut:

- I. Udang putih (berat antara 41 ekor hingga 60 ekor sekilogram);
- II. Ikan bawal putih (berat antara 200 gram hingga 400 gram seekor);
- III. Babi hidup;
- IV. Daging babi (perut);
- V. Daging babi (daging dan lemak);
- VI. Kobis bulat import (Indonesia dan China tidak termasuk Beijing);
- VII. Ubi kentang import (China);
- VIII. Bawang putih;
- IX. Halia tua import;
- X. Lobak putih import; dan
- XI. Lobak merah.

Skim Harga Maksimum Musim Perayaan Tahun Baru Cina 2024 akan dikuatkuasakan melalui Akta Kawalan Harga dan Antipencatutan 2011 dan membolehkan penentuan harga dibuat ke atas peringkat pengeluar, pemborong dan peruncit. Kementerian Pertanian dan Keterjaminan Makanan (KPKM) akan bekerjasama dengan melakukan pemantauan untuk memastikan keberadaan bekalan barangan adalah mencukupi. Semakan harga boleh dibuat melalui laman sesawang Kementerian Perdagangan Dalam Negeri dan Kos Sara Hidup di <https://www.kpdn.gov.my>.

Penentuan harga ini dibuat dengan mengambil kira pandangan dari industri, Kementerian Pertanian dan Keterjaminan Makanan serta agensi di bawahnya dan input data yang dikutip oleh Bahagian Harga Barangan Negara (BHBN).

Untuk makluman, seramai 2,200 orang anggota Penguat Kuasa KPDN bersama-sama 900 Pegawai Pemantau Harga KPDN di seluruh negara telah ditugaskan di lokasi-lokasi strategik seperti di pusat membeli-belah barangan keperluan perayaan. Pelaksanaan penugasan di lapangan membolehkan penguatkuasaan dilaksanakan dengan lebih berkesan di mana tindakan segera dapat diambil terhadap aduan pengguna dan tindakan penguatkuasaan ke atas peniaga sekiranya berlaku ketidakpatuhan.

Tindakan tegas akan diambil terhadap peniaga yang gagal mematuhi peraturan-peraturan di bawah skim ini. Mana-mana peniaga yang melakukan kesalahan akan diambil tindakan di bawah Akta Kawalan Harga dan Antipencatutan 2011 dan boleh dikenakan penalti seperti berikut:

- (i) Kesalahan menjual barangan harga terkawal melebihi harga maksimum:
 - (a) Individu; boleh didenda oleh mahkamah sehingga RM100,000 atau dipenjarakan tidak melebihi tiga tahun atau kedua-duanya atau dikompaun sehingga RM50,000; dan
 - (b) Syarikat; boleh didenda sehingga RM500,000 atau dikompaun sehingga RM250,000;
- (ii) Kesalahan gagal meletakkan tanda harga berwarna merah jambu bagi barangan harga terkawal:
 - (a) Individu; boleh didenda oleh mahkamah sehingga RM10,000 atau dikompaun sehingga RM5,000; dan
 - (b) Syarikat; boleh didenda sehingga RM20,000 atau dikompaun sehingga RM10,000.

KPDN meminta kerjasama orang ramai untuk memaklumkan sebarang aduan melalui saluran berikut:

- i. WhatsApp iaitu 019-848 8000 / 019-279 4317;
- ii. Portal e-Aduan KPDN iaitu <http://eaduan.kpdn.gov.my>;
- iii. Call Centre 1-800-886-800, dan;
- iv. Aplikasi Telefon Pintar Ez ADU KPDN.

YB SENATOR PUAN HAJAH FUZIAH BINTI SALLEH,
Timbalan Menteri Perdagangan Dalam Negeri
Dan Kos Sara Hidup.

###